



Kamis, 15 September 2022

Ogen: Josua 14:8-12



Nehenlahi Aku



Kira-kira adi lit kalak ngatakensa, 'nehenlah aku,' kai nge lit i bas perukurenta? Adi positif rukur ninta ia kalak si hebat, pang erbahan sada usihen si mehuli. Adi enggo katakenna nehenlah aku, ugapa pe iusahakenna lalap erbahan si mehuli. Sebalikna adi negatif kita rukur, ninta petua-tuaken, uga kal kin enggo ia hebatna.

Sekali enda Kalep ngeran man Josua nina, 'nehenlah aku.' Kai nge kira-kira si ituriken Kaleb man Josua bage pe man banta kerina? Si pemena, Kaleb nginget kerina pedah Tuhan man Musa kerna kecibal bangsa Israel, umur Kaleb tupung e 45 tahun denga. Padan Tuhan, taneh Kanaan e ibereken man bangsa Israel jadi inganna tading ras erdahin. E maka ikirim Musa Josua ras Kaleb jadi mata-mata ku taneh Kanaan. Ulih ia jadi mata-mata e iberekenna laporen si tuhuna man Musa, la bali bagi laporen mata-mata si deban. Kaleb jujur nuriken uga litna. Si peduaken, Kaleb encikep tetap janji Tuhan si ngerana kerna taneh Kanaan e uga pa pe ibereken man bangsa Israel. E maka Kaleb tetap patuh ngikutken kai si ikataken Tuhan man bana. Si peteluken, Kaleb nakasiken kegeluhenna, enggo pe umur 85 tahun tetap denga gegehna bagi sanga umur 40 tahun erkiteken Tuhan. Janah di kune pe isuruh ia erperang ngasup denga ia guna naluken musuh-musuhna. Si peempatkan, Kaleb mindo man Josua kai si enggo ipadanken Dibata man bana, e me gelah man bana ibereken taneh deleng-deleng guna jadi sikerajangenna. Arah Kaleb e banci kita erlajar kerna kinitekenna si tetap man Tuhan. Enggo pe ndekah Tuhan e erpadan man Musa lalap iingetna, ras icikepna enteguh. Kepatuhenna man Tuhan e jadi usihen. I abs kejujurena ras kegigihenna pe pantas jadi usihen, la idamina keselamatan guna dirina jine. Pang ia nuriken kerna si tuhu-tuhu, la ia mbiar aminna mesangat ndalanisa gelah banci bengket ku taneh Kanaan e. Bujur nge Kaleb ngerana, nehenlah aku, sabap melala si man usihen i bas ia nari. Man Moria kerina, kai si man usihen i bas kita nari?